



Sesida dals

10 d'avust 2021

Communitgà ils

13 d'avust 2021

Protocol nr.

702/2021

Incumbensa Hofmann

concernent la trasparenza dals salaris en l'administraziun chantunala

Resposta da la Regenza

Tar il punct 1: Ils princips da la salarisaziun èn fixads en ils art. 18 ss. da la Lescha davart la relaziun da lavur da las collavuraturas e dals collavuraturs dal chantun Grischun (Lescha dal persunal, LP; DG 170.400) ed èn pia accessibels publicamain. Sin basa da questas indicaziuns po vegnir calculada la tabella dals salaris cun las classas da salari e cun las scalas dals salaris. En il rom da la revisiun da la preschentaziun da l'administraziun chantunala sco patruna vegn l'Uffizi da persunal a publitgar la tabella dals salaris en ina furma adequata en l'internet.

Tar il punct 2: Per valitar las plazzas da lavur vegnan resguardadas cunzunt las pre-tensiuns fundamentalas, spiertalas e corporalas, las pretensiuns da caracter sco er la chargia da lavur e las cundiziuns da lavur (art. 21 al. 2 LP). Tras la valitaziun da las singulas funcziuns tenor ils criteris da l'art. 21 al. 1 LP resulta ina valur eruida en moda analitica e sistematica, la quala determinescha la classificaziun objectiva da las plazzas en las classas da funcziun.

Per fixar ils salaris da las novas collavuraturas e dals novs collavuraturs resguarda l'Uffizi da persunal la scolaziun, l'experiencia professiunala, l'experiencia da vita sco er enconuschientschas ed abilitads spezialas en l'educaziun, en l'assistenza ed en l'organisaziun. Ulteriurs criteris per fixar ils salaris èn la cumparegliaziun traversala interna, l'usit en la bransch e las cundiziuns sin il martgà da lavur (art. 16 al. 1

da l'Ordinaziun dal persunal [OP; DG 170.410]). Uschia procura l'Uffizi da persunal per ina pratica unitara tar ils salaris initials.

Sch'il salari inicial (100 % dal volumen dal salari) per la classe da salari respectiva vegniss inditgà en ils inserats da plazzas, pudess quai – ord vista da la Regenza – retegnair candidatas e candidats potenzials da candidar per ina piazza libra, perquai ch'il salari effectiv po esser pli aut (potenzialmain fin 142 %). Sche la scolaziun necessaria manca anc, poi percenter dar ina sutclassificaziun, nua ch'il salari effectiv sa chatta sut ils 100 % dal volumen dal salari publitgà.

Tar il punct 3: Tut las collavuraturas ed ils collavurats dal chantun han la pussaivladad da consultar lur agen rendaint dal salari sur il portal online da l'Uffizi da persunal. Mintga midada en il rendaint dal salari ha per consequenza ch'il rendaint dal salari vegn tramess automaticamain per posta a la collavuratura u al collavuratur. Uschia vegni garantì ch'er collavuraturas e collavurats senza access a l'internet èn infurmads davart lur salari. En la resposta a la dumonda Cavegn concernent la trasparenza dals salaris per las emploiadas ed ils emploiads chantunals (sessiun da december 2018) ha la Regenza incumbensà l'Uffizi da persunal d'inditgar sin il rendaint dal salari las infurmaziuns decisivas per determinar il salari resp. la classe da salari ed il stadi en il svilup individual dal salari entaifer la classe da salari. Ils rendaints dals salaris èn vegnids adattads per il 1. da fanadur 2019. Plinavant po la tabella dals salaris vegnir consultada en l'intranet da l'Uffizi da persunal.

Sin basa da questas explicaziuns propona la Regenza al Cussegl grond d'acceptar il punct 1 da questa incumbensa, da refusar il punct 2 e da stritgar il punct 3 sco liquidà.



En num da la Regenza

Il president:

Dr. Mario Cavigelli

Il cancellier:

Daniel Spadin